





# 《光绪湖南通志》点校 (第五卷)

湖南省地方志编纂委员会

# 《光绪湖南通志》点校 (第五卷)

湖南省地方志编纂委员会



CBS 湖南人民出版社

# 湖南通志卷二百

## 人物志四十一

### 国朝二十六

#### 桂阳州<sup>①</sup>

周光节，明世袭指挥同知，功加总兵。顺治十三年归诚，授游击。康熙十三年逆藩吴三桂叛，胁授伪副将，不从。寻从抚蛮灭寇将军恢复广西，授原职。致仕。旧《志》。

李人龙，字虎文。康熙丁酉举人。性至孝。母病，步出延医，路遇虎。泣告曰：“我即可饱汝腹，如母病何？”虎遽去，母亦寻愈。旧《志》。

邓苟保，少孤，力耕奉母。康熙初，母为虎啮，苟保奋枪刺之，虎毙。苟保力竭亦卒。旧《志》。

夏日文，《州志》作夏旼。廪生。母病，剖胸肉寸许以疗。及卒，哀毁骨立。与兄弟析产，让其美者。人称孝友。旧《志》。

何文廙，诸生。甫七岁，生母卒，事嫡母甚谨。值寇乱，仓卒中惟负母出，他物一无所恋。母歿，哀毁尽礼，别居茹素者三年。学使以下皆旌之。旧《志》。

宁立隆，由拔廷试第一，授南康通判，累擢饶州知府。所至有廉惠声。旧《志》。

<sup>①</sup>桂阳州：明洪武元年（1368）改桂阳路为府，九年降为县，并省府治平阳县。十三年升为州，属衡州府，治今桂阳县。辖境相当今湖南桂阳、临武、蓝山、嘉禾等县地。清雍正十年（1732）升为直隶州，属湖南省。1913年废，改本州为桂阳县。

王兴伟，家贫，佣田不足自给，岁饥乏食，当婚期，度无以供养，自至妇家请退婚，妇父许之而不嫁其女。兴伟归益困，念村里无可为计，当出游谋资生。母曰：“无食奈何？”兴伟泣对曰：“家中所有，足供母三岁食。三岁儿不归，必死矣。魂当依母旁，三呼必有应。”遂出为丐工，三年归，得百金。妇父乃召兴伟，告以女未嫁，复择吉娶妻，共养母。邻里闻见者，莫不感泣焉。《州志》。

吴为相，少有颖才，性简略。顺治庚子举于乡，不乐仕进。会试不第，归隐。知州董之辅甚重之，属修州志，诸纂次尽付之。时诸生集者百数，议论尽出为相下，已而诸生皆散去。为相一人属稿，日数十纸，五月书成，人叹为莫及也。为相文古懿渊雅，有典故大义，志行超洁。自董之辅、吴宗杞、田元恺皆贤牧，尽宾礼之。《州志》。

吴鲸，字东渭。乾隆乙卯举人。父国春，家中贫，以山路阻险，独斲修万丈，年六十，犹自荷畚鍤督工作，坐是倾其家。鲸贫而嗜学，好酒跌宕醉歌，声出金石。嘉庆中，补醴陵训导，即绝酒。讲宋儒主敬之学，曰人师难为，傲不可长。纂《宋元明讲学诸语录》，别正伪，辨朱陆，未就，卒于官斋。初，鲸父以修路至破产，及鲸乡举，以徒杠成文，受知中高选，人以为善报。鲸叔父国栋，贫无子，亦躬修道途，以利行者，竟得子云。《州志》。

李长年，字而眉。有文名。知州陈邦器大叹异之，与订交，且刊行其集。康熙中，以贡生授训导，不就。居家敦睦任恤，为时所称。子国淇，有学行。孙人龙，字灵川，九岁能文，康熙丁酉举于乡。性笃孝，母病，入山访医，遇虎当路前，祝之，虎弭耳去，母病寻愈。以文名驰誉湖广，然卒不第。晚得知县，未几卒。《州志》。

李隆礼，字秩斋，长年四世孙也。文思藻远，博览多通。以拔贡生入京师，时方开四库馆，辇下文学称盛。长沙刘权之以洗马司校勘，独重隆礼，尝就咨访，以此名动京朝官。久之归。壬子举于乡，老矣。先补辰溪教谕，后补邵阳教谕，晚主讲鹿峰书院，后生以为楷则，赋咏多流传者。《州志》。

曹昌，字炽南。举嘉庆戊午乡试，补祁县知县，以勤慎著。亲老告归，改宁乡训导。性谨飭，不妄交。州中俗以五月五日赛龙渡，大凑诸山曰三堂神，作大轮龙舟，数百人挽行市中，践蹋人至死，即曳倒民屋，无敢论糜费生事，颇为患。昌乃请禁之，遂罢。子德鸿，道光辛卯举人，国子监典籍，好善有父风。孙任相，字劭臣，工文赋，教授州中二十余年，为名诸生。抚弟孤子成立，州牧高其行谊。咸丰初元，举孝廉方正，以任相名上，力辞不敢当。语人曰：“盛名难副。俗薄为患久矣，且孝廉科本劝三民庠序，士不宜以此自异。”闻者叹服。卒年六十五。《州志》。

廖周任，字仁安。少丧父母，哀毁成疾，人药之，愈。自憾不知医，未能疗亲病，发愤呕血，疾复厉。昏顿间，有方巾葛袍者，拂以扇，大汗得苏，已而疾瘳。言其状，族长者曰：“是汝祖也。”周任由此益谨于行。晚而目盲，子武深素孝，求医罔效，即斋祷于神，燃巨烛跪请命，烛尽乃起，周任目复明。人咸曰“有是父，宜有是子也”。次子武煌，善居积，亦孝友，喜施予。尝往衡州遇讼者，劝譬不肯休，出己费二百金使罢讼去。与兄武深课季弟怀清读，具修脯必丰。怀清字冰如，益笃行自飭。隆冬时，先父未寝，抱被令暖，乃进之。父有疾，医者妄言尝粪辨寒热，即尝之。道光己亥举于

乡，两试礼部不第，遂隐居教授。事兄尤尽礼，为时所称。《州志》。

**邓孟趾**，字呈祥。父某有罪，孟趾自引当之，流河南，遇赦归。乾隆中，州县岁时行乡饮礼，由州人举宾介，其选颇重孟趾。刑人例不齿，州以其孝，特举为宾用，显示吏民。年八十二卒。《州志》。

**李崇晏**，母患风疾，常需背负行庭中。知州尝以事行乡，宿崇晏宅，崇晏无迎待之礼，知州怪之。夜半，见崇晏负母行，绕庭不休，问知其孝。明日，召奖之，曰“汝为亲慢客，茅容流也”。归告州吏民，由此显名。《州志》。

**阳载旦**，字首卿。州学生。多赀好施。岁有谷帛以养族中废疾孤独者，故阳氏无丐人。岁饥，复出谷百石贍其族。知州及学官皆造庐礼焉。《州志》。

**王伊士**，初州隶衡州府，每岁科试，士子畏十八滩之险，多不敢赴郡。雍正十年，伊士援澧州分棚例，呈请题奏，得谕旨。乃度地鼎建考棚，更捐千金置学舍二，为诸生肄业之所。至今赖之。《州志》。

**何浩然**，字希孟。拔贡生。聚徒讲授，一以身教。尝曰：“孔子论克己复礼，惟在视听言动，无非礼而已。论之至浅易，行之至难。”故终身无厉言遽色，人见之自肃如也。州人乐爱其教，主讲鹿峰书院，生徒无倾颇过行云。《州志》。

**颜玉光**，州学生。放于诗酒，磊落自喜，面斥人过，人卒无怨者。善疗目疾，自施药。家贫，不常得钱，得即合药。遇求医者，其疾深即留置空室中饮食，治之愈乃使去。邻妇病，求药需重金，顾室中无可为计，惘惘不乐，其友怪之，以情告，友遽出赀助之，疾果愈，至今乡人传之。其为诗，清峭有古风。《州志》。

**李在公**，字公达。诸生。幼失恃，事继母雷极孝。雷病，尝粪以验瘥剧，虽裙屣必亲涤之。《州志》。

**何洞**，字咫斋。少颖敏，年十五，试衡州府堂，文赋冠其首，录送第一，入学为附生。明年，补廪生。越六年，为雍正壬子，举于乡，两试礼部，皆登明通进士。久之，补宁乡教谕，移沅江。俸满，迁大埔知县。大埔民朴事简，洞至治民事如家事，暇即延文士饮酒，县耆老诸生入见，皆与言诗，留饮酒，人人醉而出，喜告乡人，何公长者，无老幼皆爱乐其政。而洞性疏放，不乐久仕。以俸入买山种松，筑室其中，曰万松菴。既成，遽告归，闭门，益饮酒。年七十四卒。《州志》。

**何潭**，字清来。年十五，衡州府录送第一，学政试再第一。谓诸生曰：“衡郡十州县无此才也。”王步青以通《四书讲义》名一时，得潭文辄录之。乾隆癸酉，由副榜登乡举第二。应礼部试，辄绌。以经义教授两湖间，弟子数百人。衡山旷楚贤已得举，从潭受经三年，以二甲第一人入翰林。自是从学益众。泰和姚颐提学湖南，潭为酃县教谕，往谒，颐惊起曰“何先生犹学官耶，颐诵公文熟矣”。

潭为学严正，亲党莫见其情容。教子弟以礼。年七十六卒。《州志》。

**刘敬祖**，字其中。幼习儒术，辍业，为铅商。乾隆时，铅什饶，益致货累巨万，挥霍慕义。邻人负债将嫁妇，敬祖闻夜哭，代偿主者。主故土豪，欲得妇，故难之，委曲乃解。当乡试，州人士归者多困乏。敬祖商于衡，日询归舟，遇桂阳州诸生，辄资其用，还则受之，终不问所贷多少，以此得侠名。为人排难济急，来谢，不自居也。弟范以货选西安府经历，布政使郭某见范，问桂阳刘其中汝族耶？范惊对兄敬祖字也，何自识公？公揖范，上设宾主礼，曰：“吾昔困汉口，其中不问名姓，假二百金得归，心不敢一日忘。为报贤兄，藩司俸禄厚，可以偿前负矣。”范历署神木、甘泉知县，护耀州事，军功迁韩城知县，有干才。敬祖以货为卫守备。年六十二卒。《州志》。

**刘承泽**，字桂园，敬祖孙也。以县丞发山东，屡试佐职。不乐为吏，告归居乡里，多所利济。州建义仓，承泽往蓝山、临武界采运，奸贾不便，聚众将掠其谷。承泽出谕以理，众莫能怒。两县官弗善也，复留难之。承泽敷陈政体，事竟行。族与人有械斗事，躬往要族众归。敌反围其村，众汹汹，承泽阳招族众议于祠，反扃其门，倡斗者不得出。己独与怨家语，反复开譬，遂和解如初。《州志》。

**李隆堦**，字伯望。乾隆中，入货为酉阳州判。知州以事出，当收漕米，委判代监视上仓。隆堦以官斗平概，仓吏胥役大失望。知州归，竟言判要誉亏赋，知州嫌之。隆堦闻，诣州请复量，少当责判代偿，多即散之民。知州故先浮收，辞不可。隆堦固请，不得已，定期日开仓。民间闻判以平概取，尤奔走相告语，压场观听几千人。唱筹平量，量满斛，辄呼噪，合声唱数之。计常额外，反浮出千余石，哗笑声如潮，知州面发赤。隆堦取粮册，按多少一日散还之。上官奇其才，令署绵州知州，政声大起。自以清直，惧不合时宜，寻告归，州人送之有流涕者。隆堦明风角射覆之术，按察使失要囚，隆堦进见，则延坐设酒，手樱桃问隆堦：“君知我何所问，能占之乎？”对曰：“桃者，逃也。于文娶为系颈旁倚木，重囚逃耳。然不出公手，五日得矣。”已而，如其言。《州志》。

**曹德赞**，字仲襄。年十二，以背诵《十三经》为学政张姚成所赏，取入州学。年十九，举于乡。又十五年，成嘉庆己巳进士，选庶吉士。逾二年，改繁昌知县。繁昌剧县也，前令积牍数百，德赞至，不数日悉决所疑难，名大著。夏旱，出祷辄雨。邻境蝗起，不入境。德赞反出疆督壮丁代邻县捕蝗，邻县民为作《捕蝗图》。繁昌通七省大道，窃盗时发，旧不能治。德赞时夜出督役巡缉，又严比伍，五载大治，至夜不闭户。两为同考官，得士王广荫、王铸戴，咸宜柳际清等，皆知名。在官八年，父忧归，士大夫走送数十里。服阕，以母老请终养。家居三十年，母成氏年至耄耋，白发侍养，湖湘衣冠传羨之。德赞为学求实用，自成童至老，未尝释卷。主鹿峰书院，州中登科第者皆其弟子。然尤自检饬，不通要贵。陶澍督两江，梁章钜为布政使，皆同年相引重，以德赞故，江南吏移书招之，报曰：“某家居奉亲，三公不易能虚枉故人手札，不能以手版向故人也。”澍等高之。年七十八卒。其在家修州城，建义仓，思深虑远。卒未数年，有广西寇乱，犹赖其备焉。子任坚，字友白。道光壬辰，由拔贡举于乡，官安化教谕十二年，课诸生犹子弟，甚为县人所思。《州志》。

**魏显敬**，字城一。州学生。訾笑不苟，坐不倨倚。尝监鹿峰书院，诸生畏惮之，莫敢与久谈。遭父丧，庐墓三年。事兄尽礼。嘉庆初元，举孝廉方正，赐六品冠带。老益敦行，家饶于货，好施与。

常曰省己繁费，可济人困乏。乡邻有争者，质显敬辄得解。及其死也，州人哀惜之。《州志》。

**许冠英**，字伟堂。嘉庆中副榜，久为经师，弟子数百人，皆先用行谊为训，然后讲贯。有强族侵其父墓，众忿激，将讼之。冠英自往请见其豪，出地券，愿更丈量，豪沮谢，一日而事定。年七十余，补永绥厅训导。道光二十六年也，永绥苗以小衅焚屯寨，将略城，同知翟诰议抚，檄冠英遣人诱其渠帅来降。越二年，湖南大饥，倡建义仓，厅民无流亡者。咸丰初，举团练御寇之法，冠英博采古今乡兵守望长策，为《团练缉要》，手自校写，以授其徒。其后，州人领兵有名者，曰陈士杰、魏喻义，皆冠英弟子也。年八十四卒。《州志》。

**胡溶**，字印川。嘉庆庚午举人。署唐县知县，去之日，民遮道攀辕，及赴院司，请留者数百人，由是有循吏称。补灵寿知县，自陆陇其讲学灵寿，立松阳书院，民士知学几二百年。岁久，书院渐倾废。溶至，首复之。又曰：宋儒立书院，以待不为科举者。夫中材讲性理，废文章。科第沦落，则其地鄙野不闻。朝廷之政，衣冠之盛，浸久而并绝，文士甚非教也。孔子使漆雕开仕，何害科举。乃以举子业课县生徒，诵声洋洋焉。县民相聚赌博，荒正业，严刑禁之。河水为患，除其害。以劳卒官。《州志》。

**雷澍万**，字苏亭。九岁能文，所授经能自正句读。萧山汤金钊督湖南学政，取为拔贡生，年四十二矣。澍万天材超轶，博览强记，用诗赋擅一时，州中后学论声韵，藻采必师澍万，与曹德赞并号工馆体。弟子尤众。性友爱，兄为贾，负债数百金，以己所得货代偿之。族人来告贷，视己所有，必分给焉。在京心动念母，遽归。母病寻卒，庐墓侧，有大鸟覆其茔，久之乃去。晚筑室临钟水，亭馆略备，皆因山水自然，号石笏山房。外辟一径曰愚谷，遂老焉。年六十八卒。《州志》。

**李茂**，字松坡。道光戊子举人。署永顺府教授、生员某以事褫衣衿，既辨得复。当由学具文，旧例学官以为利，茂无所取，某感之，送钱四万。茂惊问得状，愕曰：学使所复，钱不可受也。补长沙府教授，以忧归，俄卒。茂事后母以孝。为诸生时，从弟家中有魑祟，人往辄飞石击之。茂至，责数魑魑，寂然不敢为祟。每作辄往，往辄验。茂行事颇为俗讪笑，邪魑乃敬惮之云。《州志》。

**张声恒**，为村塾童子师。咸丰五年，广东红巾贼陈良等陷州城，州西北乡结团拒贼。声恒领乡兵为一队，敢战，屡有功。后投王鑫于连州，鑫令帅百人别为营，分米食之，约战胜乃食口粮。居数日，令攻坚屯，声恒帅百人力战，贼败退至隘口，阻山自固，兵不能入。乃佯退，贼出追，则反战，贼退至隘口，仍相持。如是者三。日且晡，声恒急不知所为计，乃远退至平田。贼出追，即疾行与贼争隘。贼急退，则兵贼已相挤，贼不能断道，声恒夺隘入。王鑫以大队乘之，遂破贼屯。声恒遂以勇闻，累功至都司。左宗棠以京卿领军援浙江，求敢战士。声恒愤武官见轻，弃官入赘得府同知，随宗棠麾下为裨将，与贼接战，最有名，擢道员。宗棠令独将攻富阳，轻骑先驱，遇贼伏几覆，宗棠切责之。声恒竟发愤呕血死，宗棠尤痛惜之。照军营病故例，赠太仆寺卿。子祖龙，荫州判。《褒忠录》。

**何英华**，累功叙守备。咸丰四年，随提督塔齐布剿湖北贼，追击至蕲州烂泥滩死之。《褒忠录》。

陈辉楚，监生。世居泗州寨，为北乡大族。土贼尹尚英、刘胡子既合，胁众万人，以泗州陈氏先治团练，相率来攻。辉楚已七十矣。陈氏族皆出战，以辉楚老，不持兵。既合，贼势盛，众欲退。辉楚笑接枪曰：“勿谓吾衰老，请为若毙其先锋。”会悍贼执大刀，前刺之立仆，众大惊。贼继进搏，辉楚再殪之，贼却欲去。顷之，村后贼旗出，左路已溃，贼入矣，众惊散且尽。辉楚战且退，贼追之，刃数人，力尽而死。诏赐恤荫如礼。子玉阶，袭云骑尉，后以战功至游击。辉楚赠三品阶。《褒忠录》。

陈庚星，貌魁梧，绝有力，以技击名于广西，弟子传拳法者数百人。咸丰三年，隶曾国藩大营，为材官。四年春，粤逆再由岳州陷湘潭，屯长沙靖港，上下瞰省城，皆半日程。庚星从大军下攻靖港，战不利，庚星断后，溃卒争浮桥，桥裂，遂死之。庚星兄月星，亦以膂力闻，官把总。咸丰五年，战于州北杏村桥，陷阵受重创死。议恤如例。《褒忠录》。

谢希韩，字又退。州廪生。咸丰二年，粤逆掠州城，希韩居太坪，当贼道，村人或避或否。希韩正坐堂上，一贼先入，手巨槌击之，贼立仆。数贼至，希韩骂益厉，贼攒矛刺之死，火庐。希韩长女负父自后走出，顷之少苏，土屋火不发。贼入视，失希韩，传呼索白须老生甚急。希韩伤重，义不辱，强起跃池中死。《褒忠录》。

邓天爵，诸生。咸丰五年，石达开陷州城，乡兵并起杀贼。天爵居石栏，率邓氏子弟数百人固守。贼大至，邓氏兵逆战，天爵躬持矛杀数人，为后贼所钞，兵溃被执。灼刺毒苦，骂益厉，与其族人邓友松俱死。友松死时，年九十有六。《褒忠录》。

曹宏钊，字耀南，德赞长孙也。幼应武试连不利，乃独居田间，自力穡养母。咸丰五年，红巾贼再犯州城，过牛轭岭。宏钊为乡兵，戍岭遇贼，独格斗，援绝而死。妻李氏，同日抗节被重创，逾日死，以烈见旌。《褒忠录》。

王廷兰，字玉书。幼失怙恃，世母蒋氏抚育之。家饶于貲，人有急投之，无识不识，倾意结纳。咸丰二年，举团练法，廷兰主南乡练局。五年，贼据郴州，分党略地至太和墟，桂阳大震。廷兰再会乡人，议起兵御贼，皆惧不应。廷兰益愤怒，自率族子弟二百人成一队，夜至太和墟试惊贼，贼遽走，还州城。廷兰喜曰：贼易与。明日，具酒食，发书请耆老巨室，会太和墟议守御，稍有至者。其夜，贼复至，众惶恐奔走。廷兰知事不就，乃独计己所有，专自召募。素与临武团长罗耀南等相结，跣行走两路口求救。耀南以临武兵二千五百人至，皆资食王氏。遂与贼战鲁塘，大捷，乘胜克太和墟，议攻州城。贼大惧，出众数千，阳言趋西乡，潜兵南行。乡兵以累胜深进，廷兰骑羸先行，卒与贼遇，被获。临武壮丁闻报，急驰救。贼急刺廷兰，洞腹未即死，救者至，贼释廷兰，壮士负之反走。至九头关，复为贼所钞击，廷兰知不免，遇临武溃卒，辄呼谢曰：“诸君幸念我，请为我报仇，我死无所恨。”遂骂贼死。照八品官例赐恤荫如例，祠昭忠祠。《褒忠录》。

曹任堪，字希张，德赞四子。入貲补邵阳典史，缉奸盗，清狱囚，有能名。父丧归，值粤寇乱起，省中遣兵防南边，军用不继。任堪出银粟佐军，叙功得府经历。咸丰九年，石达开犯州城，任堪出走，将投乡兵营。方食村舍，寇至，任堪骂不肯起，贼縶之同行。至斗下渡，我兵扼桥力战，任堪

识其旌旗，急奔之，贼乱斫之仆。乡兵既破贼，负归，创重死。《褒忠录》。

**王玉书**，州南乡团总。咸丰五年，贼踞州城，玉书捐貲募勇，并给其米粮。会官军进剿贼于州属九头关，中伏，与团长黄孟全同陷阵死。《褒忠录》。

**何魁**，道光辛卯武举。咸丰五年，尹尚英徒党自常宁石门山走州北白羊山，卒至舍人渡。城中闻土寇至，以魁将团兵往，偕千总刘澍匀行，与舍人渡团长增生侯东合兵。及遇贼，乡兵惧，不敢进，贼反奔，我军乡兵溃，魁等死之。事闻，三人并予恤荫如例。《褒忠录》。

**陈谟柏**，州猎户。初从唐训方为哨长，以功擢千总。石达开由花园堡趋常宁，谟柏从陈士杰募百人守下斗桥。达开盛兵欲渡水，卒相遇。谟柏顾兵少，不力战将殁，殊死斗。贼陷桥，一当一，不得逞，乃持久不退。自辰至午，我军饥困稍却，贼乘之。会陈士杰、魏喻义援兵两路集，贼误中伏，遽反走，士杰取间道要之游鱼关，贼大至，众相顾莫敢进。谟柏领一哨，顾谓众士曰：本所以来要贼立奇功，相持何益？尔等勇者自从我。遂徒步持矛，瞋目大呼，陷阵入其下，数十人从之。贼却愕，众军继进，大败贼。而谟柏及陈谟章等五人受重创死。谟章年十六，为乡兵，每战居前，多所斩获。善走，奔马不及也。与谟柏并进破垒，斩伪将军。深入中炮死。谟柏已积功至守备，谟章千总。事闻，恤如例。同死五人均祀州昭忠祠。《褒忠录》。

**赵大廉**，少习击刺。从陈士杰复州城，以功至守备。从魏喻义屡战有功，擢都司，赏花翎。追贼鲁观洞，大捷。大廉私谓士杰曰：军伍不整，再战必败。已而果败。咸丰十年，军屯道州，战于四广桥，死焉。以游击例恤其忠。《褒忠录》。

## 临武县

**蒋良鉴**，字灵初。四岁失恃。稍长，事父及继母即知孝敬，虽极贫必曲致甘旨。亲每落一齿，遗一发，悉存之。及歿，尽纳棺中。服阕，肖像事之，出告反面如生。顺治十四年旌。旧《志》。

**郑世仍**，字云子。弱冠，以淹博闻。中年授徒，究心濂洛之学<sup>①</sup>。顺治中，由岁贡授州判，未谒选卒。旧《志》。

**邝世培**，顺治中由恩贡授知浙江石门县，一意爱民，当时谓“太和元气充满浚山语水间”。旧《志》。

**毆国璋**，雍正十二年，任绥宁把总，驻防锡坡哨。乾隆五年苗叛，国璋奉檄入洞招抚，被执不屈

<sup>①</sup>濂洛之学：廉学、洛学，均系宋代理学流派。濂学指北宋周敦颐为首的学派，因其原居道州营道（今湖南道县）濂溪而得名，也称濂溪学派。洛学是以北宋程颢、程颐为首的学派，因二程为洛阳人而得名，又因程颐曾居临伊川，二人讲学于伊洛之间，也称伊洛之学。

死。事闻，赐恤如例，荫一子，并于长安营建祠祀之，榜曰“忠烈”。旧《志》。

**李纪白**，字莲仙。雍正中，由拔贡知山阳县，廉洁而善断狱，民德之。旧《志》。

**曾承谟**，字从典。乾隆中，由贡生授湖北州判，擢知四川卢山县，以督办粮饷功，累官山西兵备道。堵筑河堤，捐俸建河神庙，晋人至今德之。旧《志》。

**罗从虎**，字天凤。乾隆戊子举人。知三水县，调陵水，葺海港，创设营房，添募乡勇，擒获洋匪渠魁，盗闻风胆落。将殊擢，以染瘴，卒于官。子宗瀛，嘉庆庚申领乡荐。旧《志》。

**陶起龙**，乾隆中由行伍从征金川，以功授把总。会攻当喝尔拉，奋勇阵亡。事闻，赐恤如例，祀昭忠祠。旧《志》。

**陈纶**，由行伍积功至镇算游击。乾隆六十年苗变，纶率子武生恩锡力战，恩锡阵亡，纶炮伤左臂。奉旨，赏戴花翎，以参将用。回任，伤发卒。嘉庆七年，父子俱祀昭忠祠。孙书珠，荫八品监生。《县志》。

**邝陞任**，本城把总。乾隆六十年，调征湖北教匪，历著劳绩。寻以病卒于来凤营。嘉庆七年，祀昭忠祠。旧《志》。

**卢学桢**，幼失怙，负薪养母。母病思肉食，学桢割乳作羹以进，母病寻愈。有司表其闻。旧《志》。

**唐冠贤**，字寅斋。少孤，事祖母至孝。馆僧寺，授徒自给。祖母陈虑妨其业，疾不以告。冠贤知之，祷于神，愿使知其疾。一夕，梦神惊之起，急归，陈果病。时人比之啮指之感焉。弟祖炳，病羸，以兄俭素不肯御甘旨。冠贤假他人钱，具酒肉托遗之。当乡试，以弟病不往。祖炳固劝，行至白沙，梦弟披发至，即兼行还视弟。七日，弟死，亲敛之。有从子讼叔父，闻冠贤知其事，愧惧遂寝。以端直见重乡里，尝有大讼，讼者归，或问畏官乎？官威定何如？答曰，未若对唐先生。其刚正如此。老而力学，尝枕砖石警其寐，倦辄绕屋走。以岁贡终。《县志》。

**李世纯**，拔贡生。以教习知县分发河南，历任有声。官新野时，获巨盗，膺卓异，将擢升阶。疾发，卒于官。士民思其政绩，肖像祀之。《县志》。

**杜廊章**，邑增生。家贫，购书籍不惜费。人问之，则曰：“以此贻子孙，不胜于金玉乎？”精卢扁业，嘘枯吹朽，不辞劳，亦不计利。长子学礼，通籍后有劝改途者，答曰“此固范文正所谓良相也，借此亦可培植子孙小技”云哉。存心之仁如此。《县志》。

**杜曰珩**，字宝田。品行端谨，学有根柢。道光丁酉举人。历任祁阳、安乡教谕，尝集诸生，讲学必先行谊。胶庠俊秀，咸服其教。嗣选武冈学正，未赴任卒。《县志》。

苏良枋，乾隆甲寅举人。嘉庆间，重修邑志，延为总纂。任浏阳教谕，门墙肃穆，勤于训迪，从游者多所成就。《县志》。

邝祥玠，字璜溪。事亲笃孝。道光癸卯，援例就教职。初任慈利学，夜秉烛阅课卷，坐房忽塌。及启视，颓砖破瓦中，有板二扇悬架蔽其体，竟无恙。越十余日，讣至，即其母寿终之夕也。人以为慈孝所感。居丧一遵古礼。服阙，任永州府训导。《县志》。

雷永道，幼业儒。因母病疯痰，弃学养亲，晨夕不离。乾隆三十二年，修建学宫、文塔，捐钱十余万。其他桥梁、道路，靡不解囊倡修。邻近有孤贫无倚者十余家，人给田数亩，俾耕种终老，不计租。戚党中死无所归，为备棺槨以殡之。贫不能娶者，永道叹曰：“不孝之罪，无后为大。”假以数十金，并焚其券。《县志》。

萧万奇，由行伍起家，官虎门协都司。久在行伍，练习营制。康熙初，巡海至沙亭，遇海寇掠人舟。万奇奋轻舟与寇接，舟小战不利，万奇手刃数寇，力竭死。赠游击，优恤如例。《褒忠录》。

黄道茆，字文醴。嘉靖中举人。选浙江永康知县，调补弥勒，以礼教苗变其俗。操履廉洁，为民所思，立生祠焉。迁南安知州，卒于官。《县志》。

罗宗瀛，字书田。嘉庆庚申举人。由截取补山东邹平知县，勤于听断，案无留牍。值县蝗出，舍于郊，督役，日夜掩捕，得不为灾。修学校，兴书院，严讼棍，戢盗贼，尤著循声。以直忤当道，罢归，掌教双溪书院，卓有师范。《县志》。

李荣灿，字昂冈。少贫，负薪读书，采螺蚌易米自给。嘉庆癸酉拔贡，授安乡教谕。县大饥，司檄荣灿勘饥民户口，无遗，无冒滥。卓荐入都，举道光己亥顺天乡试，拣发云南，知弥勒县事。补宝宁，迁宁州知州。州旧有金课，官吏苛虐，激而变，前令以反状闻。总督林则徐檄荣灿往至，则开诚化诱，因除民所不便，市月事定。迁蒙化同知，越南与开化邻，咸丰初逾河内犯，索地四十里。荣灿驰赴马白关外防御，获汉奸十余人诛之，遣使宣布朝廷德意，越人受约而退，擢开化知府。府境汉、回杂居，遍立牛丛，为积患期年，恩信既浹，化牛丛为保甲，并村筑堡，声势屹然。咸丰五年，汉回构乱围开化，荣灿料兵不及千人，乃借丁壮，躬率拒守。露面当炮矢，回民皆感奋。贼筑长围，断外援，荣灿婴守九十余日。城中粮尽，鼠一值钱千，民倚荣灿，终无叛意。已而，乡兵分道来援，回溃解围去。于是，广西阿迷、邱北、蒙自各府州县皆闻风起，结寨自守，遣豪俊来奉约束。乃兴屯政，集流亡，鼓铸大钱，流转食货。贼至，辄败却之。时越南内讧，其老街、新街、河口等处久被贼踞，又以其间次第克复，联为指臂。九年，擢云南盐法道。道梗，仍留开化。当是时，滇中惟昭通、开化二府未陷。昭通赖蜀援得保，开化用兵四年，大小百余战，行省无铢金粒米之饘，加以饥馑疾疫，濒万死而得全者，荣灿一人力也。年七十一，卒于开化，士民皆行哭失声。子崇峻，道光丙午顺天乡试南元，官贵州修文知县。《县志》。

罗耀南，字德化。县诸生。咸丰初，举行团练，耀南居县北乡，遂领壮丁为一军。五年，红巾何禄等分道逾岭，陷桂、郴二州，临武当其交，土寇屡起。耀南闻州城陷，联近地乡兵屯界上，防贼营于两路口。州南乡谭氏独拒贼苦战，贼全力攻谭村，谭氏求救。耀南躬率众入州地，与谭氏合击，大破贼，还屯两路口。贼复至，又破之，斩百余级。贼退屯太和墟，乘胜进战，贼还州城。乡民以不和败，耀南伤股，仍保两路口。其后，贼屡犯县境，皆击走之，完其县，以功擢修仁知县。时广西乱久，民尽为贼。而耀南以知兵见重，至则令知象州。初，象州人韦应元起乡兵逐贼，请州官，故院司以耀南往。耀南言修仁，莲唐寨土寇盘结，为象桂梗，宜先平莲唐，巡抚以饷绌难之。耀南愿毁家先募兵，即遣人归临武，尽鬻田舍，得千金。巡抚许以便宜征军粮，因令兼摄修仁县事，攻莲唐，连胜未破。应元再请官，巡抚檄耀南行入象州道，被暑疾，未至州，卒于大罗。《县志》。

谭昌琳，国学生。率乡兵从参将赵永年，屡有功。鲁观洞之战，昌琳溃团出。闻永年在围中，突入救之，贼辟易，昌琳步持矛索斗，中飞炮死。《褒忠录》。

罗一理，农民也。咸丰十年，负母避寇，为所执，呼母号泣，寇胁以刃，夺刀自刎死。《褒忠录》。

刘良古、通古兄弟，力田养父母。咸丰五年寇乱，父必利见执，良古、通古奔救，寇怒杀必利。兄弟愤痛，手搏寇刃，同死之。《褒忠录》。

吴振道，字永传，临武营马兵。道光十二年，从参将王锡朋征连州瑶。至鸡笼关，伏发，刺锡朋堕马，众骇散。振道挥刀断贼矛，掖锡朋上马，且战且行乃免。以功拔外委，赏戴蓝翎。稍迁把总，寻以耒阳功，补桂东千总，迁九溪营守备。咸丰元年，随堤督向荣出师广西，改隶都统乌兰泰部下。会永安州贼弃城走，官军追至大峒岭，乌兰泰深入被围。振道在后，方食投箸起，大呼陷阵救都统，都统已战死。振道奋矛，左右荡杀数十人，乃死。赐恤荫如例。《褒忠录》。

卢凌汉，咸丰六年，与弟秀峰同管带虎威勇，随同攻克萍乡、分宜，进复袁州，凌汉由蓝翎把总擢尽先守备。明年二月，随知府刘坤一追贼至罗坊。三月，贼万余突至，复与坤一设伏俟之，贼大败，我军进驻罗坊，遂同复临江。八年，进逼抚州。三月，坤一大败贼于龙骨渡，凌汉率所部由下游渡河，要其归路，毙贼无算，平七垒。六月，随道员刘长佑剿办新淦贼，死之。照都司例议恤。《褒忠录》。

谭秀桂，咸丰年间，粤匪入境，奉母避山中，贼见母逼之，而未见秀桂也。秀桂闻声出救，贼执之。其堂兄达礼挺身出曰：“吾弟孤，请以吾代。”贼并执之，不屈死。《褒忠录》。

傅周年，咸丰初带勇击贼，屡著劳绩。五年冬，随同参将赵永年追贼至宁远鲁光洞，奋勇直前，被围遇害。照例议恤。子昌邺，承袭云骑尉。《褒忠录》。

曾继宦，武生。前山西河东道承漠之孙，举人传纲之子。充邑团总，赏六品衔。咸丰五年，贼犯县城，率团勇堵截南关外。贼间道掠其八旬父以行，继宦舍身夺父，遇害。《褒忠录》。

黄学渊，武生。邑团总。以剿贼功，赏六品军功。咸丰五年，郴州贼窜入临武，为团总罗耀南所击。学渊设伏以俟，贼由间道佚出，率伏勇穷追，贼倒戈回向。学渊殁于阵，谋客监生孙燕翼同死。《褒忠录》。

罗宏发，廪生，继含兄。咸丰十年正月，石逆回窜江西，取道境内。宏发令继含护老弱先行，已负粮食以从。甫出门，遇贼，老弱云散，贼猝继含发索金银。宏发后至，见之驰救，与贼力斗。继含乘间逃，宏发遇害。《褒忠录》。

杜学礼，字兰溪，廊章子。道光乙酉选拔，廷试高等，授工部七品小京官。后举顺天乡试，辛丑成进士。以员外郎仍归工部用，寻晋郎中。典山西乡试，得士称盛，寿阳祁世长其最著也。学礼究心经世之学，在部二十余年，练习掌故，为堂上官所倚任。晚援例以道员试用广东，历署高廉惠潮诸道，所至御寇安民，有政绩。以老告归，寻卒。《采册》。

## 蓝山县

邓智聪，父礼，客宁远病卒，智聪扶柩归，庐于墓侧。夜有虎吼其旁，智聪不为动，久之虎亦驯。人以为孝感。旧《志》。

彭一举，康熙间贡生。博学笃行。遇称贷无吝色，临歿悉焚其券，犹疑有焚未尽者，戒其子后有贷勿索券。旧《志》。

陈永都，有寓民赵姓者，负永都债不能偿，将鬻其女。永都闻之，亟还其券，复赠银米慰遣之。旧《志》。

陈积芳，诸生。父歿，哀毁庐墓。有司表其庐。旧《志》。

顾继才，四岁丧父，事母李尽色养。母病，衣不解带者三阅月。及歿，庐墓三年。以孝行旌。旧《志》。

黄星显，诸生。父客始兴卒，星显徒跣扶柩归，结庐墓侧，哀毁柴瘠，遂以身殉。旧《志》。

廖式曾，嘉庆中副贡生。补桑植训导，以俸满例入省考验。巡抚性严急，式曾雅步徘徊，巡抚怒，厉声问：“汝何所人？”式曾抗声曰：“蓝山人也。”巡抚愈怒，叱曰：“可归矣，”则对曰“诺”，徐步退，容色自如。巡抚意解，复呼教官来，式曾还，巡抚好言曰“归汝官所耳”，则亦诺，徐步如始入。巡抚反奇之，称于同官焉。《县志》。

吴肇封，岁贡生。咸丰四年，粤逆窜蓝山，肇封率南平乡子弟助剿，为县令倚重。五年春，嘉禾

贼尹石保纠众啸聚，肇封率团勇擒之，保授东安训导。九年三月，粤逆逼东安，肇封与县令李右文、典史蒋庆保、把总马廷荣、绅士唐麟分门而守，贼围之数重。会闻援师失利白茅市，众恇惧。肇封次子高才从之任，肇封欲脱之，高才不可，随肇封城上不少离。时雨甚，城中泥溅溅，比户多哭声。肇封意气不少衰，回环巡徼，相持七昼夜，子药皆罄。肇封谓高才曰：“吾父子麁死于此，命也，亦幸也。”尽遣其左右，令乘间逃。二十二日，地雷发，城崩，贼蜂拥而入，肇封死之。高才闻城破，持矛巷战，力竭亦遇害。事闻，照例从优给恤。子国华，承袭云骑尉。《褒忠录》。

萧风煦，邑诸生。咸丰十年，任东安教谕。十月，贼酋石达开分股复陷东安，风煦死之。议恤如例。《褒忠录》。

黄万金，初立东一团练乡兵，训忠义，县中人甚重之。咸丰四年，尹尚英犯嘉禾，万金建议宜往救。率军出至大泉，适遇贼，贼反旗避之，追急，贼回斗，旁出众夹击，乡兵退。万金自督阵为贼禽，逼降不从，烧锥刺项及胸，骂益厉，引行至枏木桥乃死。《褒忠录》。

陈宏毅，母病思石榴，时隆冬树凋，宏毅涕泣求林中，见密枝间蛛丝络一实，鲜好如新。归奉母，母病良已。县旌其门。《县志》。

赵永年，任临武参将。咸丰五年，流贼窜蓝，越大慈乡。永年率兵尾其后，追及于油村洞，与战陷于淖，遂遇害。《褒忠录》。

孙纪良，监生。钟良钦，文童。咸丰三年十一月，尹尚英围蓝城，二人竭力固守。旋以督勇助战，遇贼于七里江，死焉。事闻，赠恤如例。《褒忠录》。

刘士达，字立吾。嘉庆中举人，官平江学训导。为人古貌古心，接人一以诚悃，义利之界尤严，凛然不可干以私。课士尤勤恳，以老告归卒。《县志》。

## 嘉禾县

李尚邀，与弟尚遄事母至孝。家贫，竭力奉甘旨，自进盥。及馈，兄弟必同侍，未彻不敢退。母歿，负土为茔。茔成，兄弟先后歿于其侧。旧《志》。

李先成，诸生。与弟贡生焕然极友爱，事亲俱以孝闻。值岁饥，备鬻粥济贫困。有鬻子女者，为捐金赎之。旧《志》。

胡文钟，以例监生议叙州同知。嘉禾初立，以李氏村为县治，城中乡村相难，公事多不集，议建学，数十百年未定。文钟独出千金营高垵地，迁修之，复制祭器，县学规制始备，至今称其好义。《县志》。

刘应先，以力田致富。州居边荒，农功不勤，不甚知蓄水引泉之利。应先所居乡有山泉通川，乡人无肯筑治。水盛则决塍坏田，旱则散流立涸。应先乃出己貲千金，筑坝蓄泄，取“荷铺成云”之言，名曰云祥坝。坝成，溉田数百顷，为一方之利。《县志》。

李道张，事亲曲意承志。近年，事继母益谨。友爱昆弟，有让无争。设学田二十亩，立家塾曰求志阁，建外学馆名三余堂，凡来学之士，贫者代出师俸，助给火食。尝焚借券三千余金，尤好修桥梁、道路。逢岁歉，量力施粥以济贫乏。生平忠厚传家，从无一字入公门。以耆寿终。《县志》。

李国荣，字华甫。少以文学冠其县。道光己酉拔贡，辛亥举于乡。咸丰初，洪秀全乱，土寇蜂起，国荣议团练法，先诛内奸，众畏报复，莫敢应。国荣怒曰：“良莠不并生，事败我独受其祸。”籍从逆者数百人，告县官用新例案致之法，一县悚惧。五年，红巾何禄等拥众犯嘉禾，知县袁慧业欲避贼，国荣立马前大言曰：“公将安往？今贼蔓延数百里，乱民汹汹，出城死且不忠，城小而固，粮械备具，请为公守之。”慧业下马谢曰：“君书生，乃能尔。愿相与协力。”行视守具，阅乡兵，皆国荣所先办。遂闭城，定死守。贼至，见城卑小，睥睨间揭竿扬旗，大笑之，以云梯肉薄而登。城上炮发，应响无虚发，杀数十百人。贼退为营，环围七八重。既以风轮数十具，乘上风扬灰，守陴士目眯不能视，植立终不动。又为轰车高出城数尺，设巨炮将凭城俯击。国荣募勇士伐木塞道，车碍不进，炮未发，城上炮反中车，车碎。贼奔走，乃日夜出兵分道惊我师。国荣令四城楼吹笙笛，歌曲相和。围七昼夜，城中气益暇。贼帅叹曰：“蕞尔城，大有人也。”引众去之。国荣以此名闻一州。明年，叙守城功，加同知衔，以知县候选。国荣不乐，再试礼部，下第归。以亲老家居，大吏莫知其材，无可自见。颇为诗好沉饮，往往过午方起。顷之卒。《县志》。

萧义贤，监生。司临武团防局会计。咸丰十年正月贼至，腰缠所存勇貲以行，遇贼为所获，意为素封也。问其窖藏，不承。贼怒，炮烙而死。《褒忠录》。

李梦梅，诸生。练乡丁，屡御贼，议功得训导。后入知府王德榜营司文案，从攻抚州东乡县，军溃。梦梅在营防守，贼至营陷，大骂而死。眡训导阵亡例议恤。子方瀛，袭云骑尉。《褒忠录》。

李昌言，咸丰四年，奸民尹尚英作乱，入村掠谷。昌言率其族出迎战，杀贼七人。明日，贼复至，分左右进，生执昌言，骂贼死。《褒忠录》。

李登云，武举。入临武营，署桂阳州千总。咸丰三年，领乡兵驻县城，土寇起，闻有备，不敢攻城。夜趋坛村墟，登云即夜帅兵追袭。未明奄至，围其墟，破门入，擒斩十余人，余尽俘之。明年，县城破，巷战被执，贼恨登云甚，支解其体悬四门。县人祀之昭忠祠。《褒忠录》。

李良兴，当咸丰二年，洪秀全陷嘉禾等县，后土寇起富乐乡报仇，劫掠无虚日，官不暇问。良兴自前练乡勇御贼，闻寇乱，往禽讨，以众寡殊绝败死。《褒忠录》。

刘香古，咸丰五年，广东剧寇何禄等众数万陷郴、桂，趋嘉禾。香古以乡兵迎战，勇冠其军。以

深入陷阵，贼生禽香古，寸磔之。祀昭忠祠。《褒忠录》。

周承纶，咸丰五年夏，何禄攻县城，力战死。其子德才愤激，请报仇，从赵永年。每战必先登，每有斩获，不肯录功。曰：“父骨未寒，从军非为名也。”冬十月，永年追贼鲁观洞，伏发，永年死。执德才，惜其勇，诱劝之。德才怒骂，寸割死。父子同祀昭忠祠。《褒忠录》。

# 湖南通志卷二百一

## 人物志四十二 耆寿

五世同堂，依次列后。

### 唐

彭幼谦。湘阴人，百四十余岁。

### 宋

魏测。平江人，百岁。

### 元

邹庆。新化人，百四岁。

### 明

许斌。益阳人，百三十岁。淇棕庆。安化人，百十九岁。姜岁富。衡阳人，百六岁。欧阳绍铤。衡山人，百四十三岁。周兴鸾。酃人，百三岁。李世銮。零陵人，百二岁。谭文秀。邵阳人，百四岁。邹大翰。新化人，百五岁。邹崇豪。新化人，百一岁。潘思。武冈人，百二岁。满廷富。麻阳人，百四岁。储维。靖州人，百岁。陈策。安乡人，百四岁。张仁。安福人，百十岁。张荣二。永定人，百二十岁。